

戴叔倫 司空曙 陳羽

唐詩百名家全集

埽葉山房發行

戴叔倫詩集目錄

湖南容管經畧使潤州戴叔倫幼公

五言古詩

去婦怨

古意

南野

曾遊

江行

孤鴻篇

感懷二首

喜雨

歎葵花

從軍

七言古詩

女耕田行

柳花歌送客往桂陽

邊城曲

屯田詞

巫山高

早春曲

白字詞

行路難

相思曲

五言律詩

送別錢起

送張南史

春日早朝應制

早行寄朱放

除夜宿石頭驛

吳明府自遠而來留宿

客夜與故人偶集

送友人東歸

江上別張駕

廣陵送趙主簿自蜀歸

別友人

宿城南咸本道懷皇甫冉

暉上人獨坐亭

送崔融

遊少林寺

崇德道中

雨

過賈誼宅

冬日有懷李賀長吉

送郎士元

春江獨釣

山居即事

賦得長亭柳

客中言懷

山行

春日訪山人

卧病

贈月溪羽士

贈行脚僧

重遊長真寺

晚望

寄贈翠巖奉上人

過龍灣五王閣訪友人不遇

與友人過山寺

送王明府

送耿十三緯復往遼海

寄禪師寺華上人次韻三首

獨坐

舟中見雨

送僧南歸

江干

過友人隱居

宿天竺寺曉發羅源

留宿羅源西峯寺示輝上人

題橫山寺

泛舟

宿靈巖寺

江上別劉駕

南軒

泊雁

七言律詩

寄萬德躬故居

酬耿少府見寄

寄司空曙

過故人陳羽山居

贈慧上人

吊暢當

寄劉禹錫

寄孟東野

贈徐山人

過賈誼舊居

宮詞

宮人入道

二靈寺守歲

莫春感懷二首

哭朱放

五言絕句

贈李唐山人

留別顧明府

題秦隱君麗句亭

三閭廟

送王司直

宿無可上人房

山居

口號

夜坐

隄上柳

遣興

贈張揮使

偶成

畫蟬

題天柱山圖

松鶴

草堂一上人

題黃司直園

北山游亭

七言絕句

對月答元明府

湘南即事

送呂少府

贈殷亮

夏日登鶴巖偶成

題淨居寺

昭君詞

織女詞

塞上曲二首

閨怨

春怨

旅次寄湖南張郎中

題友人山居

別鄭谷

贈鶴林上人

題稚川山水

過柳溪道院


荔枝

憶原上人

閑思

蘭溪棹歌

蘇溪亭



戴叔倫詩集

湖南容管經畧使潤州戴叔倫幼公

五言古詩

去婦怨

出戶不敢啼風悲日悵悵心知恩義絕誰忍分明別下坂車轉轉畏逢鄉里親空持牀前幔却寄家中人
忽辭王吉去為是秋胡死若比今日情煩冤不相似

古意

悠悠南山雲濯濯東流水念我平生歡托居在東里失既不足憂得亦不為喜安貧固其然處賤寧獨恥
雲閑虛我心水清澹吾味雲水俱無心斯可長伉儷

南野

治田長山下引流坦溪曲東山有遺壘南野起新築家世素業儒子孫鄙食祿披雲朝出畊帶月夜歸讀
身勤竟亡疲團團欣在目野芳綠可採泉美清可掬茂樹延晚涼早田候秋熟茶烹松火紅酒吸荷杯綠
解佩臨清池撫栗看修竹此懷誰與同此樂君所獨

曾遊

泊舟古城下高閣快登眺大江會彭蠡羣峯割玄嶠清影涵空明黛色凝遠照碑留太史書詞刻長公調
絕粒感楚囚丹衷猶照耀懷哉不可招憑闌一悲嘯

江行

漾舟晴川裏掛席候風生臨泛何容與愛此江水清
蘆洲隱遙嶂露日映孤城自願踈野性屢忘鷗鳥情
聊復於時顧暫欲解塵纓驅馳非吾願虛懷浩已盈

孤鴻篇

江上雙飛鴻欲啄行相隨翔風一何厲中道傷其雌
顧影明月下哀鳴聲正悲已無矰繳患豈乏稻粱資
嗚嗚慕儔匹遠集清江湄中有孤文鷗翩翩好容儀
共欣相知遇畢志同棲遯野田鷓鴣鳥相妬復相疑
鴻志不汝較奮翅起高飛焉隨腐鼠欲負此雲霄期

感懷二首

尺帛無長裁淺水無長流
水淺易成枯帛短誰人收
人生取舍閒趨競固非優
舊交跡雖踈中心自云稠
新交意雖密中道生怨尤
踈踈復踈踈世路今悠悠
主人飲君酒勸君弗相違
但當盡弘量鵬至無復辭
人生百年中會合能幾時
不見枝上花昨滿今漸稀
花落還再開人老無少期
古來賢達士飲酒不復疑

喜雨

閑居倦時燠開軒俯平林
雷聲殷遙空雲氣布層陰
川上風雨來灑然滌煩襟
田家共歡笑溝澮亦已深
團團聚鄰曲斗酒相與斟
樵歌野田中漁釣滄江湄
蒼天既有念悠悠終我心

歎葵花

今日見花落明日見花開花開能向日花落委蒼苔自不同凡卉有時幾日迴

從軍行

丈夫四方志結髮事遠遊遠遊歷燕薊獨戍邊城陬西風隴水寒明月關山愁酬恩仗孤劍十年敝貂裘
封侯屬何人蹉跎雪盈頭老馬思故樞窮鱗憶深流彈鋏動深慨浩歌氣橫秋報國期努力功名良見收
七言古詩

女耕田行

乳燕入巢筍成竹誰家二女種新穀無人無牛不及犁持刀斫地翻作泥自言家貧母年老長兄從軍未
娶嫂去年災疫牛困室截絹買刀都市中掩面是人識以刀代牛誰與同姊妹相攜心正苦不見路
人唯見土䟽通畦隴防亂苗整頓溝塍待時雨日正南岡下餉歸可憐朝雉擾驚飛東鄰西舍花發盡共
惜餘芳淚滿衣

柳花歌送客往桂陽

滄浪渡頭柳花發斷續因風飛不絕搖烟拂水積翠間綴雪含霜誰忍攀夾岸紛紛送君去鳴榔孤尋到
何處移家深入桂水源種柳新成花更繁定知別後消散盡却憶今朝傷旅魂

邊城曲

人生莫作遠行客遠行莫成黃沙磧黃沙磧下八月時霜風裂膚百草衰塵沙晴天迷道路河水悠悠向
東去胡笳聽徹雙淚流羈魂慘慘生邊愁原頭獵犬夜相向馬蹄踴躍膺冰上不侶京華俠少年清歌妙

舞落花前

屯田詞

春來耕田徧沙磧老稚欣欣種禾麥麥苗漸長天苦晴土乾确确鉏不得新禾未熟飛蝗至青苗食盡餘
枯莖捕蝗歸來守空屋囊無寸帛餅無粟十月移屯來向城官教去伐南山木驅牛駕車入山去霜重草
枯牛凍死艱辛歷盡誰得知望斷天南淚如雨

巫山高

巫山我我高插天危峯十二凌紫烟瞿塘嘈嘈急如弦洄流遡逆將覆船雲梯豈可進百丈那可牽陸行
巉巖水不前灑淚向流水淚歸東海邊含愁對明月明月空自圓故鄉回首思綿綿側身天地心茫然

早春曲

青樓昨夜東風轉錦帳凝寒覺春淺垂楊搖綠鶯亂啼裊裊烟光不堪翦博山吹雲籠腦香銅壺滴愁更
漏長玉頰啼紅夢初醒羞見青鸞鏡中影儂家少年愛遊逸萬里輪蹄去無跡朱顏未衰消息稀腸斷天
涯草空碧

白字詞

館娃宮中露華冷月落啼鴉散金井吳王扶頭酒初醒東燭張筵樂清景美人不眠憊夜永起舞亭亭亂
花影新裁白字勝紅綃玉佩珠纓金步搖回鶯轉鳳意自嬌銀箏錦瑟聲相調君恩如水流不斷但願年
年同此宵東風吹花落庭樹春色催人等閑去大家為歡莫猶豫頃刻銅龍報天曙

行路難

出門行路難富貴安可期淮陰不免惡少辱阮生亦作窮途悲顛倒英雄古來有封侯却屬屠沽兒長安車馬隨輕肥青雲賓從紛交馳白眼向人多意氣寧牛烹羊如折葵讌樂寧知白日短時時醉擁雙蛾眉揚雄閉門空讀書門前碧草春離離不如拂衣且歸去世上浮名徒爾為

相思曲

高樓重重開明月腸斷仙郎隔年別紫簫橫笛寂無聲獨向瑤窻坐愁絕魚沈雁杳天涯路始信人間別離苦恨滿牙牀翡翠衾怨折金釵鳳皇股井深轆轤嗟綆短衣帶相思日應緩將刀斫水水復連揮刃割情情不斷落紅亂逐東流水一點芳心為君死妾身願作巫山雲飛入仙郎夢魂裏

五言律詩

送別錢起

陽關多古調無余醉中聞歸夢吳山遠離情楚水分孤舟經暮雨征路入秋雲後夜同明月山窻足憶君

送張南史

陋巷無車轍烟蘿總是春賈生獨未達原憲竟忘貧羣座留山月荷衣遠洛塵最憐知己在林下訪閑人

春日早朝應制

仙仗肅朝官承平聖主歡月沈宮漏靜雨濕禁花寒丹荔來金闕朱櫻貢玉盤六龍扶御日只許近臣看

早行寄朱放

山曉旅人去天高秋氣悲明河川上沒芳草露中衰此別又千里少年能幾時心知剡溪路聊且寄前期

除夜宿石頭

一作橋驛

旅館誰相問寒燈獨可親一年將盡夜萬里未歸人寥落悲前事支離笑此身愁顏與衰鬢明日又逢春

吳明府自遠而來留宿

出門逢故友衣服滿塵埃歲月不可問山川何處來綺城容散宅散職寄靈臺自此留君醉相歡得幾迴

客夜與故人偶集

天秋月又滿城闕夜千重運作江南會翻疑夢裏逢風枝驚暗鵲露草覆寒蛩羈旅常堪醉相留畏曉鐘

送友人東歸

英華作逢許許事

萬里楊柳色出關送故人輕烟拂流水落日照行塵積夢江湖闊憶家兄弟貧徘徊灞亭上不語自傷春

江上別張駕

年年五湖上厭見五湖春長醉非關酒多愁不為貧山川迷道路伊洛困風塵今日扁舟別俱為滄海人

廣陵送趙主簿自蜀歸

英華有絳州寧觀

將歸汾水上遠自錦城來已泛西江盡仍隨北雁迴暮雲征馬速曉月故關開漸向庭闈近留君醉一杯

別友人

英華作別汝南董校書

擾擾倦行役相逢陳蔡間如何百年內不見一人閑對酒惜餘景問程愁亂山秋風萬里道又出穆陵關

宿城南感本道懷皇甫冉

暑夜宿南城懷人夢不成高樓邀落月疊鼓送殘更隔浦雲林近滿川風露清東碕不可見矯首若為情
暉上人獨坐亭

蕭條人境外兀坐獨參禪蘿月明盤石松風落澗泉性空長入定心悟自通玄去住渾無跡青山謝世緣
送崔融

王者應無敵天兵動遠征建牙連朔漠飛騎入胡城夜月邊塵影秋風隴水聲陳琳能草檄含笑出長平
遊少林寺

步入招提路因之訪道林石龕蒼蘚積香徑白雲深雙樹含秋色孤峯起夕陰屢廊行欲徧回首一長吟
崇德道中

暖日茅心稠晴烟麥穗抽客心雙去翼歸夢一扁舟廢塔巢雙鶴長波漾白鷗關山明月到愴惻十年遊
雨

歷歷愁心亂迢迢獨夜長春帆江上雨曉鏡鬢邊霜啼鳥雲山靜落花溪水香家人亦念我與汝黠相忘
過賈誼宅

一謫長沙地三年數逐臣上書憂漢室作賦弔靈均舊宅荒秋草西風薦客頻淒涼回首處不見洛陽人
冬日有懷李賀長吉

歲晚齋居寂情人動我思每因一樽酒重和百篇詩月冷猿啼慘天高雁去遲夜郎流落久何日是歸期
送郎士元

白髮金陵客懷歸不暫留交情分兩地行色載孤舟黃葉蟬吟晚滄江雁送秋何年重會此詩酒復追遊
春江獨釣

獨釣春江上春江引起長斷烟樓草碧流水帶花香心事同沙鳥浮生寄野航荷衣塵不染何用濯滄浪
山居即事

巖雲掩竹扉去鳥帶餘暉地僻生涯薄山深俗事稀養花分宿雨翦葉補秋衣野渡逢漁子同舟蕩月歸
賦得長亭柳

濯濯長亭柳陰連瀟水流雨搓金縷細烟裊翠絲柔送客添新恨聽鶯憶舊遊贈行多折取那得到深秋
客中言懷

白髮照烏紗逢人只自嗟官閑如致仕客久似無家夜雨孤燈夢春風幾度花故園歸有日詩酒老生涯
山行

山行分曙色一路見人稀野鳥啼還歇林花情不飛雲迷樓鶴寺水澀釣魚磯回首天將暝逢僧話未歸
春日訪山人

遠訪山中客分泉設煮茶相攜林下坐共惜鬢邊華歸路逢殘雨沿溪見落花候門童子問遊樂到誰家
卧病

門掩青山卧莓苔積雨深病多知藥性客久見人心衆鳥趨林健孤蟬抱葉吟滄洲詩社散無夢盍朋簪
贈月溪羽士

月明溪水上誰識步虛聲夜靜金波冷風清玉練平自知塵夢遠一洗道心清更弄瑤笙罷秋空鶴又鳴

贈行脚僧

補衲隨緣住難維塵外蹤木杯能渡水鐵鉢肯降龍到處棲雲榻何年卧雪峯知師歸日近應偃舊房松

重遊長真寺

同到長真寺青山四面同鳥啼花竹暗人散戶庭空蒲澗千年雨松門午夜風舊遊悲往日回首各西東

晚望

山氣碧氤氲深林帶夕曛人歸孤嶂晚犬吠隔溪雲杉竹何年種烟塵此地分桃源寧異此猶恐世間聞

寄贈翠巖奉上人

蘭若倚西岡年深松桂長似聞葛洪井還近贊公房掛衲雲林淨翻經石榻涼下方一回首烟露日蒼蒼

過龍灣五王閣訪友人不遇

野橋秋水落江閣暝烟微白日又欲午高人猶未歸青林依石塔虛館靜柴扉坐久思題字翻憐柿葉稀

與友人過山寺

共有春山興幽尋此日同談時訪靈徹入社愧陶公竹暗閑房雨茶香別院風誰知塵境外路與白雲通

送王明府

古井庇幽亭涓涓一竇明仙源通海水靈液孕山精久旱寧同涸長年祇自清欲彰真白操酌獻使君行

送耿十三緯復往遼海

仗劍萬里去孤城遼海東旌旗愁落日鼓角壯悲風野迴邊城急烽消戍壘空轅門正休暇投策拜元戎
寄禪師寺華上人次韻三首

百年渾是客白髮總盈顛佛國三秋別雲臺五色連朝盤香積飯夜窺落花泉遙憶談玄地月高人未眠
禪心如落葉不逐曉風顛猊座翻蕭瑟羣比丘接連芙蓉開紫霧湘玉映清泉白晝談經罷閑從石上眠
德士名難避風流學濟顛禮羅加璧至薦鴉與雲連塵世休飛錫松林且枕泉近聞離講席聽雨半山眠
獨坐

白髮懷閩嶠丹心戀薊門官閑勝道院宅遠類荒村二月霜花薄羣山雨氣昏東菑春事及好向野人論
舟中見雨

今夜初聽雨江南杜若青功名何處養兄弟總彫零夢遠愁蝴蝶情深愧鶴鷄撫孤終日意身世尚流萍
送僧南歸

兵塵猶瀕洞僧舍亦徵求師向江南去方輟下留風霜兩足白宇宙一身浮歸及梅花發題詩寄隴頭
江干

江干望不極樓閣影繽紛水氣多為雨人烟遠是雲予生何復落客路轉辛勤楊柳牽愁思和春上翠裙
過友人隱居

瀟灑絕塵喧清溪流遶門水聲鳴石瀨蘿影到林軒地靜留眠鹿庭虛下飲猿春花正夾岸何必問桃源
宿天竺寺曉發羅源